



## Югъан язгъан биринчи кагъыз

Югъанны бу кагъызы мекенли бир жыйынны аты тутулуп язылмагъан. Шо саялы да бу Исагъа о девюрде иман салгъанланы барысы да учун язылгъан кагъыз гысапда охула. Биринчи юз йлыны ахырларына таба бираз алдынлар Сююнч Хабар билдирилген ерлерде Иса Месигъни ва оъзю янгы иманны гъакъында бир тюрлю ялгъан уйретивлер генг кюйде яйылмагъа башлай. Гъатта Исагъа иман салгъанланы жыйынларында да шо уйретивлер гъеч бир кюрчюсюз инамлыкъ булан къабул этиле болгъан. Бир-бир ялгъан устазлар, мисал учун, Аллагъны Уланы болгъан Иса Месигъ бу дюньяда озге инсанлардай болгъанын гери ургъанлар. Шо саялы да элчи Югъан оъзюню кагъызында иманны аслу маънасы гъакъда, Исагъа гъакъ герти кюйде иман салгъанланы нечик белгилерине къарап билип болагъаны гъакъда тындырыкълы кюйде сэйлей: олар Аллагъ Инсан болуп, Оъзюню жанын бизин учун къурбан да этип, бизге Оъзюню сюююн гёрсетген деп билдирелер. Олар озлер шо сюювге тюшюнгенлер ва шону озгелеге де савгъат этип берелер. Югъан Аллагъгъа бакъгъан якъдагъы шолай тюшюнюв гелтиреген яхшы гъасиллени эсге сала: «„Аллагъ булан бирликде яшайман“, – деп айтагъан гиши оъзю де Иса яшагъан кюйде яшамагъа герек» (2:6).

### *Яшав береген Калам*

**1** <sup>1</sup> Биз сизге башдан Болгъанны – яшав береген Каламны – гъакъын да язабыз. Биз Ону эшитгенбиз, гёзлерибиз булан гёрюп къаргъанбыз ва къолларыбыз булан тийгенбиз. <sup>2</sup> О ачыкъ кюйде гёрсетилди. Биз Ону гёрдюк ва Ону гъакъында шагъатлыкъ этебиз. Биз сизге О даимлик яшав экенни билдиребиз. О Атабыз Аллагъ булан болгъан, сонг бизге де гёрсетилген. <sup>3</sup> Сиз де бизге къошулуп къатнашыгъыз деп, гёрген ва эшитген затларыбызны сизге де билдиребиз. Бизин шо къатнашывубуз буса Атабыз ва Ону Уланы Иса Месигъ буландыр. <sup>4</sup> Муну да сизге бизин сююнчюбуз толу болсун учун язабыз.

### *Нюрде яшав къалыгъыз*

<sup>5</sup> Исадан эшитген ва сизге билдиреген хабар муна будур: Аллагъ нюрдю, Онда гъеч бир къарангылыкъ ёкъдур. <sup>6</sup> Эгер биз Аллагъ булан къатнашабыз деп айтып, оъзюбуз къарангылыкъда юрюй бусакъ, биз ялгъан айтабыз ва гъакъ гертилике гёре яшамайбыз. <sup>7</sup> Эгер Аллагъ нюрде болгъаны йимик, биз де нюрде яшай бусакъ, бир-бирибиз булан къатнашывубуз болур ва Исаны – Ону Уланыны – къаны бизин бары да гюнагъларыбыздан тазалар.

<sup>8</sup> Эгер биз гюнагълы тюгюлбуз деп айта бусакъ, оъз-оъзюбузюню алдатабыз ва бизде гъакъ гертилике ёкъ. <sup>9</sup> Эгер биз гюнагъ ишлерибизге мюкюрлюк этсек, инамлы ва адилли болгъан Аллагъ гюнагъ ишлерибизден гечер ва гъар-бир яманлыкъдан тазалар. <sup>10</sup> Эгер биз гюнагъ ишлер этмегенбиз деп айта бусакъ, Аллагъны ялгъанчы этип гёрсетеген болабыз ва юреклерибизде Ону каламына ер болмас.

**2** <sup>1</sup> Балаларым! Буланы сизге сиз гюнагъ ишлер этмесин деп язаман. Амма биригиз гюнагъ ишлер этсегиз де, Атабызны алдында бизин якълавчубуз бар. О адилли болгъан Иса Месигъдир. <sup>2</sup> О оъзю бизин гюнагъларыбызны ва бютюн дюньяны гюнагъларын да гечдиреген къурбан. <sup>3</sup> Биз Ону таныйгъаныбызны булай билип болабыз: эгер де Ону буйрукъларын кюте бусакъ, биз Ону таныйбыз. <sup>4</sup> «Мен Ону таныйман», – деп де айтып, Ону буйрукъларын кютмейген гиши – ялгъанчы ва онда гъакъ гертилике ёкъ. <sup>5</sup> Ким Аллагъны каламын кюте буса, Аллагъны сюювю камиллигине етишген. Шолайлыкъда, Аллагъ булан бирликде яшайгъаныбызны билмеге болурбуз. <sup>6</sup> «Аллагъ булан бирликде яшайман», – деп айтагъан гиши оъзю де Иса яшагъан кюйде яшамагъа герек.

<sup>7</sup> Сююмлю къардашларым, мен сизге янгы бир буйрукъну тюгюл, башдан берли де сизге берилген эсги буйрукъну гъакъында язаман. О буйрукъ – сиз оъзюню гъакъында эшитген хабар. <sup>8</sup> Бирдагъы якъдан, мен язагъан зат янгы буйрукъ да дюр. Ону гъакълыгъы Исаны ва сизин яшавугъуз булан исбат этилген. Неге тюгюл де, къарангылыкъ тая, гъакъ нюр буса шавла бере.

<sup>9</sup> «Нюрде яшайман», – деп де айтып, оъзюню иман къардашын гёрюп ярамайгъан гиши гъали де къарангылыкъда яшайдыр. <sup>10</sup> Иман къардашын сюеген гиши нюрде яшай ва ону яшавунда гюнагъ иш этер йимик ёлгъа тюшюреген бир зат да болмай. <sup>11</sup> Амма иман къардашын гёрюп ярамайгъан гиши къарангылыкъда яшай ва къарангылыкъда юрюй. О къайда барагъанын билмей, неге тюгюл къарангылыкъ ону гёзлерин сокъур этген.

<sup>12</sup> Сизге язаман, балаларым, неге тюгюл де Исаны яхшылыгъындан сизин гюнагъларыгъыз гечилген.

- <sup>13</sup> Сизге язаман, аталар, неге тююл сиз башдан берли  
Болгъанны таныйсыз.  
Сизге язаман, жагиллер, неге тююл сиз иблистен уьст  
гелгенсиз.
- <sup>14</sup> Сизге язаман, яшлар, неге тююл сиз Атабызны таныйсыз.  
Сизге язаман, аталар, неге тююл сиз башдан берли  
Болгъанны таныйсыз.  
Сизге язаман, жагиллер, неге тююл сиз гючлюсюз ва Аллагъны  
каламы ичигизде яшай. Сиз иблистен уьст гелгенсиз.

<sup>15</sup> Я бу дюньяны, я бу дюньяда бар затланы сюймегиз. Бу дюньяны ким  
сюе буса, о Атабызны сюймей. <sup>16</sup> Неге тююл де, бу дюньяда бар болгъан  
гъар зат – къаркъараларыбыз гъасирет, гёзлерибиз гёрмеге гъасирет, бу  
яшавда инсанлар оьзлер булан оьктем болагъан затлар – булар барысы да  
Атабыздан тююл, бу дюньядан. <sup>17</sup> Бу дюнья ва адамлар гъасирет болгъан  
затлар гете, амма Аллагъ сюйгенни этеген буса даим яшажакъ.

#### *Исаны ахыр замандагъы душманлары*

<sup>18</sup> Балаларым, ахыр заман ювукълашгъан. Сиз де эшитгенигиз йимик,  
Месигъни душманы гележек ва гъали хыйлы олай душманлар арагъа  
чыгъып да тура. Ахыр заман ювукълашгъанны биз шондан да билебиз.  
<sup>19</sup> Месигъни шо душманлары бизин арабыздан чыкъгъанлар, амма олар  
бизден тююллер. Эгер олар бизден болгъан эди буса, бизин булан къа-  
лар эдилер. Амма олар арабыздан чыгъып гетген, шо да оланы бири де  
бизден тююл экенни исбат эте.

<sup>20</sup> Аллагъ сизге Оьзюню Ругъуну белгисин салгъан, шолайлыкъда сиз  
гъакъ гертиликни билесиз. <sup>21</sup> Сиз гъакъ гертиликни билмей деп язмай-  
ман мен, сиз ону билегенигиз саялы ва гъакъ гертилик ялгъанны ярат-  
майгъаны саялы язаман.

<sup>22</sup> Ялгъанчы кимдир? Иса Месигъ экенин инкар этеген гиши – ял-  
гъанчы. Шолай адам – Месигъни душманы. О Атабызны ва Ону Ула-  
нын инкар эте. <sup>23</sup> Уланын инкар этегенни Атасы да ёкъ. Уланын къабул  
этегенни Атасы да бар.

<sup>24</sup> Башдан берли эшитген затлагъа амин болугъуз. Шолай этсегиз,  
Уланы ва Атасы булан бирликде яшарсыз. <sup>25</sup> Иса бизге ваьда этгени  
даимлик яшавдур.

<sup>26</sup> Мен буланы сизге сизин алдатмагъа сюегенлер барны билдирмек  
учун язаман. <sup>27</sup> Амма Аллагъ сизге Оьзюню Ругъуну белгисин салгъан.  
Аллагъны Ругъу сизин булан болур ва сизге гъеч биревню де уйретив-  
лери тарыкълы болмас. О сизин гъар затгъа уйрете. Ону уйретивю  
гъакъ, ялгъан тююл. Шо саялы О сизин уйретеген кюйде этип, Аллагъ  
булан бирликде яшап къалыгъыз.

#### *Аллагъны авлетлери*

<sup>28</sup> Балаларым, Иса булан бирликде яшап къалыгъыз. Иса къайтып гел-  
генде, биз Ону алдында инамлы кюйде токътажакъбыз, Ондан уялагъан  
гъалда болмажакъбыз. <sup>29</sup> Эгер де сиз Аллагъ адилли экенин биле болгъан  
сонг, адилли кюйде иш гёреген гъар ким де Ону авлети экенин де билесиз.

**З** <sup>1</sup> Бир къарагъыз чы, бизге «Аллагъны авлетлери» деп айтылмагъа  
ихтияр берип, Атабыз бизин нечик кёп сюегенин гёрсетди! Гертилей  
де, биз Аллагъны авлетлерибиз! Бу дюньяны адамлары Ону танымай-  
гъаны саялы, бизин де танымай. <sup>2</sup> Сююмлю къардашларым! Биз гъали  
Аллагъны авлетлерибиз, амма гележекде дагъы да ким болажагъыбыз  
гъали де белгили тююл. Иса янгъдан гёрюнген заманда буса, Огъар  
ошажагъыбызны билебиз. Неге тююл де, Ону бар болгъан кююнде гё-  
режекбиз! <sup>3</sup> Ким Исагъа бакъгъан якъдагъы шо умутну уьзмесе, Ону  
йимик шолай тазаланып яшап къалажакъ.

<sup>4</sup> Гюнагъ иш этеген гъар ким Аллагъны Къанунун буза. Гюнагъ этмек  
Къанунну бузмакъдыр. <sup>5</sup> Иса инсанланы гюнагъларын оьзюню уьстюне  
алмакъ учун гелгенни ва Ону Оьзюню буса гюнагъы ёгъун сиз билесиз.  
<sup>6</sup> Иса булан бирликде яшайгъан гюнагъ ишлер этмей. Гюнагъ ишлер  
этивюн узатып турагъан буса Ону не гёрмеген, не танымагъан.

<sup>7</sup> Балаларым! Сизин бирев де адашдырып къоймасын. Иса муьмин  
болгъаны йимик, муьмин кюйде иш гёреген де – муьмин гиши. <sup>8</sup> Гю-  
нагъ ишлер этивюн узатып турагъан гиши иблисникидир. Иблис башдан  
берли де гюнагъ ишлер эте гелген. Аллагъны Уланы иблисни ишлерин  
ёкъ этмек учун гелген. <sup>9</sup> Аллагъны авлети болгъан гиши гюнагъ иш  
этивюн узатып турмай. Неге тююл де, Аллагъ Оьзюню барлыгъы булан  
ону юрегинде яшай. Аллагъны авлети болгъаны саялы, о гюнагъ иш эти-  
вюн узатып турмай. <sup>10</sup> Адилли кюйде иш гёрмейген гиши яда иман къар-  
дашын сюймейген гиши Аллагъныки тююл. Аллагъны авлетлерин иб-  
лисникинден муна шондан таба айырмагъа бола.

#### *Бир-биригизни сююгюз*

<sup>11</sup> Башдан берли биз эшитген буйрукъ – бир-бирибизни сюймек.  
<sup>12</sup> Иблисни айтгъанын этип, инисин оьлтюрген Къабилге ошамагъа ге-  
рек тююлбюз. Къабил инисин не учун оьлтюрген? О амаллары яман  
экенге, инисини амаллары буса адилли болгъаны саялы ону оьлтюр-  
ген. <sup>13</sup> Къардашларым, эгер бу дюньяныки болгъанлар сизин гёрюп  
ярамай буса, огъар тамаша болмагъыз. <sup>14</sup> Оьлюмден яшавгъа гёчгени-  
бизни билебиз, неге тююл иман къардашларыбызны сюебиз. Къар-  
дашын сюймейген оьлюмде къалыр. <sup>15</sup> Къардашын гёрюп ярамайгъан

адам оьлтюрювчюдюр. Гьеч бир оьлтюрювчюню даимлик яшаву бол-майгъанны сиз билесиз.

<sup>16</sup> Иса Месигъ бизин учун жанын бергенликден таба биз сююв деген не зат экенни англагъанбыз. Биз де иман къардашларыбыз учун жаныбызны бермеге гъазир болмагъа герекбиз. <sup>17</sup> Эгер дюньяда мадарлы яшайгъан бирев, иман къардашыны тарчыктыкъда экенин гёрюп, огъар рагъму этмей буса, Аллагъны сюювю онда нечик яшасын? <sup>18</sup> Балаларым! Сёзюбюз булан ва тилибиз булан тююл, гъакъ герти кюйде амалларыбыз булан сюейик.

<sup>19-20</sup> Шолайлыкъда, биз гъакъ гертиликники экенибизни билербиз. Юреклерибиз бизин айыплай буса, Аллагъны алдында паракхатлыкъны алмагъа боларбыз. Неге тююл де, Аллагъ юреклерибизден уллу ва О бары да затны биле. <sup>21</sup> Балаларым! Эгер юреклеригиз сизин айыпламай буса, Аллагъны янына тартынмай ювукълашмагъа боласыз. <sup>22</sup> Не зат тилесек де, Аллагъдан аларбыз, неге тююл биз Ону буйрукъларын кютебиз ва О сюеген ишлени этебиз. <sup>23</sup> Аллагъны буйругъу будур: Уланына – Иса Месигъге – иман салмакъ ва Иса бизге буюргъаны йимик, бир-бирибизни сюймек. <sup>24</sup> Аллагъны буйрукъларын кютеген Аллагъ булан бирликде яшай, Аллагъ да ону булан бирликде яшай. Аллагъ бизин булан бирликде яшайгъанын билебиз, неге тююл О бизге Оьзюню Ругъун берген.

#### *Гъакъ гертиликни Ругъу ва ялгъанны ругъу*

**4** <sup>1</sup> Сююмлю къардашларым! Гъар ругъгъа инанып къалмагъыз. Аллагъдан экенин яда тююлюн англамакъ учун, ругъланы сынап къарагъыз. Дюньяны гъар еринде гъали бир кёп ялгъан пайхаммарлар яйылгъан. <sup>2</sup> Сиз Аллагъны Ругъун булай билмеге болурсуз: Иса Месигъ бу дюньягъа инсан къаркъарада гелгенине мюкюрлюк этеген гъар ругъ Аллагъдандыр. <sup>3</sup> Шогъар мюкюрлюк этмейген гъеч бир ругъ Аллагъдан тююл. Шо Месигъни душманыны ругъу. О ругъ жележегин сиз эшитгенсиз ва о гелип гъали дюньяда.

<sup>4</sup> Балаларым! Сиз Аллагъныкисиз ва ялгъан пайхаммарлардан уьстюн гелгенсиз. Неге тююл де, ичигиздеги Аллагъны Ругъу бу дюньядагъындан гючлю. <sup>5</sup> Ялгъан пайхаммарлар бу дюньяныки. Шогъар гёре олар сёйлейген сёзлер де бу дюньядан, бу дюньядагъылар да олагъа къулакъ аса. <sup>6</sup> Биз буса Аллагъныкибиз ва Ону таныйгъан бизге къулакъ асар. Аллагъныки тююллер бизге тынгламас. Гъакъ гертиликни Ругъун ялгъанны ругъундан биз муна шолайлыкъда айырмагъа болабыз.

#### *Аллагъны сюювю*

<sup>7</sup> Сююмлю къардашларым! Бир-бирибизни сюейик. Неге тююл де, сююв Аллагъдан. Сюювю булангъы гъар ким – Аллагъны авлети ва Ону таный. <sup>8</sup> Сюювю ёкъ гиши Аллагъны танымагъан. Неге тююл де, Аллагъ

Оьзю – сююв. <sup>9</sup> Биз Оьзюнден таба даимлик яшав алсын учун, Аллагъ биргине-бир Уланын дюньягъа йиберген. Шоллукъда, Аллагъны сюювю бизге белгили болгъан. <sup>10</sup> Сююв биз Аллагъны сюегенлигибизде тююл, гюнагъларыбызны гечдирмек учун, къурбан этип Уланын йибермек булан Оьзю бизин сюегенин гёрсетгенликде. <sup>11</sup> Сююмлю къардашларым! Аллагъ бизин шолай бек сюйген сонг, биз де бир-бирибизни сюйме герекбиз. <sup>12</sup> Аллагъны бирев де бир заманда да гёрмеген. Эгер биз бир-бирибизни сюе бусакъ, Аллагъ бизин булан бирликде яшар ва Ону сюювю юрегибизде камил болур.

<sup>13</sup> Биз Аллагъ булан бирликде яшайгъаныбызны ва Аллагъ бизин булан бирликде яшайгъанны билебиз, неге тююл Аллагъ бизге Оьзюню Ругъун берди. <sup>14</sup> Дюньяны Къутгъарывчусу этип Атабыз Уланын йибергенни биз гёрдюк ва шогъар шагъатлыкъ этебиз. <sup>15</sup> Иса Аллагъны Уланы экенине ким мюкюрлюк этсе, о Аллагъ булан бирликде яшар, Аллагъ да ону булан бирликде яшар. <sup>16</sup> Шо саялы биз Аллагъны бизге бакъгъан якъдагъы сюювюн билдик ва шогъар бир де шеклик этмейбиз.

Аллагъ сюювдюр. Сююв булан бирликде яшайгъан Аллагъ булан бирликде яшай, Аллагъ да ону булан бирликде яшай. <sup>17</sup> Къыяматгюн биз тартынмайгъан болсун учун, сююв юреклерибизде камиллешген даражасына етишген. Неге тююл де, Иса нечик болгъан буса, биз де бу дюньяда шолайбыз. <sup>18</sup> Сюювде къоркъув ёкъ. Камил болгъан сююв къоркъувну къувадай. Къоркъув жаза булан байлавлу. Къоркъагъан гишини юрегиндеги сююв камиллешген даражасына етишмей.

<sup>19</sup> Биз Аллагъны ва бир-бирибизни сюебиз, неге тююл О бизин башлап сюйген. <sup>20</sup> Ким: «Мен Аллагъны сюемен», – деп де айтып, иман къардашын гёрюп ярамай буса, о ялгъанчыдыр. Гёрюнюп турагъан иман къардашын сюймейген Оьзюн гёрюп болмайгъан Аллагъны нечик сююп бола? <sup>21</sup> «Аллагъны сюеген гиши иман къардашын да сюймеге герек» деген буйрукъну биз Ондан алгъанбыз.

#### *Аллагъны Уланына иман салыв*

**5** <sup>1</sup> Иса Месигъ экенине иман салагъан гъар ким Аллагъны авлетидир. Атабызны сюеген адам Ону Авлетин де сюе. <sup>2</sup> Аллагъны авлетлерин сюегенибизни биз булай билип болабыз: эгер де Аллагъны да сююп, Ону буйрукъларын кюте бусакъ, биз оланы сюебиз. <sup>3</sup> Аллагъны сюймек демек Аллагъны буйрукъларын кютмек демекдир. Ону буйрукъларын кютмеге къыйын тююл. <sup>4</sup> Неге тююл де, Аллагъны авлети болгъан гъар ким дюньядан уьст геле. О оьзю иманы булан бу дюньядан уьст гелип тура. <sup>5</sup> Бу дюньядан уьст гелмеге ким болур? Янгыз Иса Аллагъны Уланы экенине иман салагъан.

<sup>6</sup> О сув ва къан булан\* гелген Иса Месигь. О янгыз сув булан тююл, сув ва къан булан гелди. Шону гьакъында шагъатлыкь этеген Аллагъны Ругьудур. Неге тююл де, Аллагъны Ругьу гьакъ гертидир. <sup>7</sup> Шону гьакъында шагъатлыкь этеген уьч зат бар: <sup>8</sup> Аллагъны Ругьу, сув ва къан. Олар уьчюсю де бир гёнгюлден бир затгъа шагъатлыкь эте\*\*. <sup>9</sup> Биз инсанланы шагъатлыкьын къабул этебиз, амма Аллагъны шагъатлыкьы ондан да артыкъ. Неге тююл де, о Аллагъны шагъатлыкьы. Аллагъ Оьзю Уланыны гьакъында шагъатлыкь этди. <sup>10</sup> Аллагъны Уланына иман салагъанны оьзюню юрегинде шо шагъатлыкь бар. Аллагъгъа инанмайгъан гиши буса Ону ялгъанчы этип гёрсетеген бола, неге тююл о Аллагъ Оьзюню Уланыны гьакъында этген шагъатлыкьгъа инанмайгъан гиши. <sup>11</sup> Аллагъны шагъатлыкьы О бизге даимлик яшав бергенликде. Шо яшав Ону Уланында. <sup>12</sup> Оьзю Аллагъны Уланы булан бирликде яшайгъанны шо яшаву да бар. Оьзю Аллагъны Уланы булан бирликде яшамайгъанны шо яшаву ёкъ.

#### *Ахыр сёзлер*

<sup>13</sup> Мен буланы сизге, Аллагъны Уланына иман салагъанлагъа, даимлик яшавугъуз барын билсин деп язаман. <sup>14</sup> Биз Аллагъны алдына тартынмайлы гелип болагъаныбызны себеби шудур: биз Ондан Оьзю рази къалагъан не затны тилесек де, О шону къабул этер. Биз Аллагъгъа инанабыз. Оьзю сюеген гъар не затгъа къыйышывлу болуп биз не зат тилесек де, О бизин эшитегенге инанабыз. <sup>15</sup> Гъар не тилесек де, Оьзю бизин эшитегенни билегенибизге гёре, тилеген затыбызны О бережегин де билебиз.

<sup>16</sup> Эгер бирев иман къардашыны оьлюмге гелтирмейген гюнагь иш этегенин гёрсе, ону учун дуа этме герек. Аллагъ да огъар яшав бережек. Мен муну оьлюмге гелтирмейген гюнагь иш этегенлени гьакъында айтаман. Оьлюмге гелтиреген гюнагь иш де бар. Мен оьлюмге гелтиреген гюнагь иши саялы дуа этсин деп айтмайман. <sup>17</sup> Гъар къайсы яман иш де – гюнагь. Амма оьлюмге гелтирмейген гюнагьлар да бар.

<sup>18</sup> Аллагъны авлети гюнагь иш этивюн узатмайгъанны биз билебиз. Аллагъны Авлети болгъан Иса ону сакълай ва иблис огъар зарал этип

\* 5:6 „О сув ва къан булан гелген“ демек – О сувгъа чомдуруп, Оьзюн Аллагъгъа тапшуртгъан ва хачгъа илинип къан тёкген демек.

\*\* 5:7-8 Бир-бир грекче къольязывларда бу аятлар «Кёклерде шону гьакъында шагъатлыкь этеген уьч зат бар: Ата, Калам ва Аллагъны Ругьу. Олар уьчюсю де бир гёнгюлден шагъатлыкь эте. Дюнъяда да шону гьакъында шагъатлыкь этеген уьч зат бар: Аллагъны Ругьу, сув ва къан. Олар уьчюсю де бир гёнгюлден бир затгъа шагъатлыкь эте» деп язылып ёлугъа.

болмай. <sup>19</sup> Биз Аллагъныки экенибизни ва бютюн дюнья иблисни къолунда экенин билебиз. <sup>20</sup> Уланы гелип гьакъ герти Аллагъны танысын учун, бизге англамагъа гюч бергенни де билебиз. Биз гьакъ герти Аллагъ булан бирликде яшайбыз, неге тююл Ону Уланы Иса Месигь булан да бирликде яшайбыз. О гьакъ герти Аллагъ ва даимлик яшав!

<sup>21</sup> Балаларым! Оьзюгюзню ялгъан аллагълагъа къуллукь этивден ари сакълагъыз!